

TITOTA

SAN PABLO KARTA KACHASKAMANDA

1 ¹Nuka Pablo, Taita Diospa lutrinsina, Jesucristo kachamuskami kani, Alli Willaita willaspa puringapa; chasaka, Taita Dios agllaskakuna paiwa suma iuiaringapa; *chiwanka, chi sutipa Alli Willaita iachagsamuspa, paita iuiarispa kaugsangapa. ²Chasa kaugsaspaka, mana puchukaridiru suma kaugsaita iukangapami suianakunchi. Kai alpa manara tiagpitami Taita Dios, mana llullag kaspas, nukanchita chasa karangapa nirka. ³Kunaura, Taita Dios niska punchami chaiarka, paipa Rimaita willangapa. Chasa willangapaka, Taita Dios nukanchita kispichigmi mingawaspa kachamuwarka. ⁴Kam Titotami kai karta kachaiki. Kamka, nukasinallatata Jesucristowa suma iuiarispa, nuka kikinpa wambrasinami kapuangi. Taita Dios i Jesucristo nukanchita kispichig, kamta kuiaspa, suma iuiaiwa kawapuachu.

Kreta alpapi, Tito ima rurai iukaskamanda

⁵Kasamandami kamta Kreta alpapi sakirkaiki: chipi kaugsanakuskata alli ruraikunata mas suma iuiachispa iachachingapa. Tukui puiblukunapi Cristowa tukuskapura iachachig taitakunata agllangapapasmi sakirkaiki; imasami nuka mingarkaiki: chasa.

⁶Iachachig taitakunaka iukankunami kanga ñi imapipas mana piñai tukungasina. Sug warmillawa kaugsachukuna. Paipa wambrakunaka, Cristowa suma iuiarigkuna kachukuna. *Mana pipas paikunamanda nichukuna: “Mana alli runakunami kankuna; taitata mana uiagkunami kankuna”. ⁷Mai-kanpas iachachig taita kaskataka, Taita Dios tukui Cristowa tukuskakunatami mingaska ka. Chimandami paita chaiá, ñi imapipas mana piñai tukungasina kangapa. *Mana kachu paipa iuiailawa rurag, maituku sugkuna: “*Mana rurakuchu” nigpipas. *Mana kachu rabiari, machangichu, piliari, imasapipas kulki mirachingapa iuiaila kag. ⁸Chasapaka iukanmi, wasima pipas chaiagriskata: “Iaikui” nidur kanga, imapipas allilla ruraita iuiaspalla ruranga,

tukuikunawa allilla iuiaiwa i tukuipi alli kanga, Taita Diosmandalla kaugsanga, ima jiru iuiaripa munai apigpipas, chita mana ruraspalla. ⁹Diuspa sutipa Rimaita iachachiskataka mana kungarispallami iuká kaugsanga; *chiwanka, sugkunata suma iuiachispa, allillata iachachingapa; chasallata, maikanpas: “Diuspa Rimai mana allilla kanchu” ninakuskata allillapi iuiachingapa.

¹⁰Alli Willaita mana uiagkunaka, achkakunami tiankuna. Judiu-kunapa marka churachingapa iachachigkuna, maspasmí mana uangapa munankuna. Chasakunaka, ianga rimaspami sugkunata pandachin-kuna. ¹¹Chasakunata chaianmi upallachingapa. Paikuna mana allillata iachachinakunchu. Paikuna iachachispami wasipi tukui kaugsagkunata pandachinakú. Chasaka, kikinkunamandallami kulki mirachinakú.

¹²Kretamanda sug willag runa, chi alpapi kaugsanakuskamanda kasami nirka: “Kai Kretapi kaugsagkuna, imaurapas llullaspa, jiru ruraspa, killa wangu mikungapaglla iuiaspami kankuna”. ¹³Chasa nispa, sutipa kaskatami willá. Chasamanda, paikunata sinchi piñaspa iuiachingi; chasaka paikuna, Cristowa mas suma iuiarigkuna kangapa. ¹⁴*Chiwanka, judiukuna kikinpa iuiaiwa rimanakuskata *mana uianakuchu. Ñi sutipa Alli Willaita sakiska kagkunatapas ima niskata ruranakuskata *mana uianakuchu.

¹⁵Alli iuiaiwa kagkunaka, tukuipi alli iuiaiwami kawankuna. Ikuti mana Cristowa iuiaripa jiru iuiaiwa kagkunaka, tukuipi mana alli iuiailawami kawankuna. Paikunapa iuiapi ima iuiariskapipas, jiru iuiailami tukugsamú. ¹⁶“Taita Diusta rigsínimi” nigpipas, mana paita rigsigsínami jiru ruraspa kaugsankuna. Chasa kaugsagkunaka, millangasinami tukun-kuna. Iapa subirbi kaspami mana pudinkuna, ñi imapas allilla rurangapa.

Allilla iachachiskallata rimangi, niskamanda

2 ¹Kamka, allilla iachachiskallata rimangi.

²Achala runakunata iachachingi, mana iapa urdimal kachukuna; tukuiwa allilla iuiaiwa kaugsanakuchu, ñi imapipas mana piñai tukungasina. Cristowa suma iuiaripa, tukuikunata allilla *kuiaspa, tukuikunawa mana piñanakuspalla kaugsanakuchu.

³Achala warmikunata chasallata iachachingi, paikuna Taita Diospalla kagkunasina kaugsachukuna, mana pimandapas wasa rimaspalla, mana machaspalla. Chasa sumaglla kaugsaspami pudinkuna, ⁴mas sipas warmikunata suma iuiachispa iachachinga, paipa kusata i wambrakunata *kuiangapa, ⁵tukuikunawa allilla iuiaiwa kangapa, tukuiwa alli kangapa, wasipi ima tiaskata ima ministiska ruraspa kangapa i kikinpa kusata suma uiaspa kaugsangapa. Chasa kaugsagpikunaka, ñi pipas mana pudin-gakunachu, Diuspa Rimaimanda ningapa: “Mana allilla kanchu”.

⁶Musukunataka chasallata iuiachingi, tukuikunawa allilla iuiaiwa kangapakuna. ⁷Kamka, tukuipi allilla rurangi. Chasaka sugkuna, kamta kawaspaka, chasallatami rurangakuna. Alli Willaita suma iachachingi, mana urdimal nispalla.

⁸Chasallata, imapipas allilla rimangi. Chasaka, mana pipas kammanda: “Mana allilla kanchu” ningakunachu. Chasa ruragpika, maikan kamta piñagkunapas, mancharispa, mana pudingakunachu, ñi ima jirupas nukanchimanda rimangapa.

⁹Lutrinkunata iachachingi, patrunta tukuipi sumaglla uiachukuna. Mana aini-rispalla, patrún ima niskata sumaglla rurachukuna. ¹⁰Sisai kagpikunaka, *mana ikuti sisachukuna. Chasa sumaglla kaugsagpikunaka, Taita Dios nukanchita kispichigmanda iachachiska iapa suma kaskatami sugkunata kawachingakuna.

¹¹Taita Dios, kikinpa wambrata kachamuspa, paipa suma kuiaitami kawa-chirka; chasaka, tukui runakuna kispiringapa. ¹²Chi kuiaiwá iachachimukumi, mana allilla iuiiakunata i jiru ruraikunata nukanchi sakingapa; *chiwanka, tukuikunawa allilla iuiaiwa kaspá, allilla ruraspá, Taita Diosmandalla iuiarispá, kai alpapi kaugsanakungapa. ¹³Kasapasmi iachachimuku: kuntintulla suiangapa, Taita Dios ima niska tukugsamunkama. Chika niraiami, nukanchipa atun Dios i kispichig Jesucristo sumaglla ikuti samungapa puncha chaiankama. ¹⁴Pai kikinmi sakirirka, nukanchimanda wañuchii tukungapa; chasaka, nukanchi tukui pandariskakunata kispichingapa. *Chiwanka nukanchi, armaskasina limpiulla tukuspa, paipalla runakuna niraiangapa. Chasaka munanakusunchimi, tukuipi allilla ruraspá kaugsanakungapa.

¹⁵Chasami iukangi, tukui iachaiwa sinchi rimanga i iuiachinga. Mana allilla ruranakuskataka iukangimi piñanga. Kamta, ñi pipas *mana wabutichu.

Cristowa tukuskakuna, imasa kaugsai iukaskakunamanda

3 ¹Tukuikunata iuiachingi, maikan mandag ima niskata suma uiaspa, ruraspá kaugsanakuchu. Imaurapas iuiapi kachukuna, allilla rurangapa. ²*Mana pimandapas wasa rimachukuna. Piliaringataka, tukuikunawa mana piñanakuspalla i mana atuniachirinakuspalla iuiapi kachukuna.

³Nukanchipas, ñugpata upasinami karkanchi. Taita Diusta mana uiaspallami chingaskasina karkanchi. Tukui jiru munaiwa, nukanchi alli iuiachiringapa iuiaiwa wataskasinami karkanchi. Parijuma piñanakuspa, jiru iuiaiwa kawanakuspa, tukui jiru ruraspami kaugsanakurkanchi. ⁴Chasa kaugsanakugpipas, Taita Dios nukanchita kispichig, runakunamanda llakirispá, paipa suma kuiaitami kikinpa wambrawa kawachimuspa, ⁵nukanchita kispichirka. Nukanchi allilla iuiarispá ruraskakunamandaka, mana; nukanchimanda llakispami pai kikin kispichirka. Nukanchipa pandariskakunata maillaskasinami ikuti tiagsamugsina niraianchi. Santu Ispirituwami chi musu kaugsaita iukanchi. ⁶Jesucristo nukanchita kispichigmandami Santu Ispirituta nukanchita achka karamurka; ⁷chasaka nukanchi, paipa suma kuiaiwá mana pandarig niraiagsamungapa. *Chiwanka suianakusunchimi, mana puchukaridiru suma kaugsaita chaskingapa.

⁸Chi willaika, tukui sutipami ka. Munanimi, kampas sugkunata sinchi rimaspá iuiachingapa. Chasaka Taita Dioswa suma iuiarigkuna, allilla ruraspami kaugsangkuna. Chi tukui suma iachachiikunaka, tukuikunamanda allipami kankuna.

⁹Sugkuna ianga rimanakuskata *mana uiakungi. Chasallata, ñugpa-manda taitakuna imasa kagkunamanda parlukunata *mana uiakungi. Moisés rurangapa niska ima niraiaskata paipura ainichirinakuskatapas *mana uiakungi. Chi parlukunaka, iangallami rimanakú; ñi pimandapas mana allilla tukunchu.

¹⁰Maikanpas Cristowa tukuskakunata sugkunawa sugkunawa piñachirinakuskataka sug biaji sug biaji piñaspa, allillapa iuiachingi. Iskaima rimaskata mana uiagpika, kamkunapurapagmanda llugsichingi. ¹¹Kasa iuiaringi: chasakuna, kikinkunami pandarinakú. Chasa pandariskakunawaka kikinkunami maskarinakú, diltudupa ninama sitai tukungapa.

Tito ima rurai iukaskamanda

¹²Waugki Artemasta u Tikikota nuka kambagma kachaura, mana unai-lla Nikópolis puibluma samungi kawawangapa. Chipimi nuka iuiakuni, tamia punchakuna *ialichingapa. ¹³Waugki Zenas, justisiakunata nukanchimanda rimagmi ka. Paita, waugki Apolostapas, kam masa pudiska aidapuangi. Chasaka, paikuna purinakuura, mana imapas pisingakunatachu. ¹⁴Nukanchi kikinpura Cristowa tukuskakunapas iachaikuchukuna, suma ruraspa, ministiskakunata aidangapa. Chasa aidagkunaka, allillapami kaugsanakunga.

Kaiakama, niskamanda

¹⁵Nukawa sugllapi kagkuna, tukuikunami kamta: “Puangi” ninkuna. Cristowa iuiaripa nukanchita *kuiagkunata: “Puangi” nipuai. Taita Dios, tukui kamwa kagkunata sumaglla kawapuachu.